

東

華

錄

東華錄

康熙六十四

臣王先謙敬編

臣周瀚替恭校

秋七月庚午諭河道總督于成龍朕觀河圖要緊應修者兩處前在南方曾面諭爾將人字河芒稻河急挑挖聞至今尙未動工甚屬遲誤又河圖內歸仁隄便民閘等口俱已堵塞毛城鋪迤下各口尙未堵塞旣將便民閘口堵塞則毛城鋪等口所出之水由何處洩出必致散漫各處民大受害此處關繫緊要宜速議奏○甲戌裁廣州將軍標左營遊擊一設中軍副將一兼管左營事○庚辰以席爾達署四川陝西總督由兵部尚書署○四川提督岳昇龍奏打箭鑪原係本朝版圖竟被烏斯藏強人侵占康熙三十五年欽差兵部郎中金圖等會同四川巡撫于養志查勘後仍霸踞如初吞

占蠻地數千里侵奪番民數萬戶又在木鴉私造銃礮屯聚糧草臣因化林營兵單汎廣移參將駐防不意彼處喋吧昌側集烈等擅發蠻兵數千占住河東擦道若儀等堡不放客商來往臣一面禁阻茶煙米布一面密遣臣標中營守備李成瑛帶領官兵五百名前往化林營貼防臣已備咨督撫會商乃撫臣于養志私遣筆帖式額爾濟圖等往來調停不使臣與聞並擅止臣所遣防兵益見私通外番情迹得旨此所奏事情亦著羅察等一併察審具奏○甲申河道總督于成龍奏邵伯更樓高郵九里等處被水衝決上諭大學士等朕慮各處閘壩俱已閉塞大水一至必至泛溢屢諭于成龍作速挑濬芒稻人字兩河今竟未挑濬卒如朕言著速行文巡撫宋犖令親赴揚州淮安收養被水百姓江西巡撫馬如龍前奏江西地方連年大熟今歲亦有秋著行文馬如龍速運

米十萬石至揚州淮安交與宋犖或煮粥或賑濟相機行事○乙酉裁宗人府滿員外郎二漢經歷一內閣滿侍讀三滿撰文中書五滿辦事中書八蒙古撰文中書一蒙古辦事中書二漢軍撰文中書一辦事中書四漢撰文中書二漢辦事中書六吏部漢軍員外郎四戶部蒙古郎中四蒙古員外郎五漢軍郎中二漢軍員外郎六漢主事四禮部漢軍員外郎二兵部蒙古郎中一滿員外郎一蒙古員外郎一漢軍員外郎四督捕滿員外郎二漢軍員外郎二漢主事二刑部漢軍員外郎八工部滿員外郎一理藩院判一漢軍員外郎四漢員外郎二理藩院漢院判一漢知事一漢副使一滿司務一蒙古司務一都察院漢軍御史三漢軍都事一通政使司漢參議一大理寺漢寺丞一漢寺副一漢軍評事一起居注滿字主事一漢字主事一詹事府漢中允一漢贊善一司經局漢

正字一漢錄事一太常寺漢協律郎一漢贊禮郎二漢司樂二光祿寺漢少卿一漢司丞一鴻臚寺漢序班四行人司漢行人四〇九卿議准戶部尙書馬齊奏臣遵旨察審山西布政使齊世武與巡撫倭倫互訐一案革職太原府知府孫毓璘原任大同府知府鄭潤中虧空庫銀倉米等項俱實倭倫並不查明奏參將齊世武詳文駁回反令知府李成龍代孫毓璘捐補虧空又原任汾陽縣李聯虧空案內有民欠銀兩經汾州府通判韓開藩將民欠徵解倭倫反指爲科派以齊世武等隱諱不報擅行奏參應將倭倫降三級調用齊世武詳報孫毓璘等虧空經巡撫駁回後並不再報又於李聯虧空案內並未聲明民欠應將齊世武降一級調用從之〇免兩淮白駒等十四場竈戶課兩年〇己丑以噶禮爲山西

巡撫

由內閣
學士選

閏七月丁酉朔以特默德爲內閣學士

由詹事選

○戊戌諭禮部如張

佳氏性行溫良克嫺內則久侍宮闈敬慎素著今以疾逝深爲軫悼其諡爲敏妃應行禮儀爾部察例行○壬寅山西巡撫噶禮陞

辭上諭凡巡撫赴任朕俱有訓旨然遵諭而行者甚少山西地

方被溫保科派迄今百姓受困倭倫居官雖無甚劣處而於科派

不肖之員不行奏參是以大失民心爾到任後務要勤勞愛民居

官若好朕卽超擢否則卽行罷斥惟爾自取朕斷無所瞻徇也○

內閣學士恩丕緣事革職○甲辰以滿都爲山西布政使

由郎中遷

己酉以白碩色爲內閣學士

由御史遷

○壬子諭禮部乳母瓜爾佳氏

久侍宮掖保護朕躬殫竭惓忱恭勤素著毖勉夙夜咸合將奉之

宜閱歷寒暑克盡調育之道每念疇昔未嘗暫忘比來嬰疾彌留

竟爾溘焉長逝深爲軫悼宜加恩封爾部議奏尋禮部議應封爲

保聖夫人從之○癸丑 上巡幸塞外啟鑾○刑部等衙門會議戶部郎中剛五達等審擬湖廣茶陵州叛賊黃明陳丹書吳旦先等一案查黃明係叛逆吳三桂下僞將軍康熙十九年大兵取柳州時遁入苗峒後經查拏苗子韋朝相假獻首級黃明因潛住苗峒多年於康熙三十七年七月間糾結陳丹書吳旦先等侵擾湖廣茶陵州攻圍衡州府俱被官兵殺敗黃明陳丹書吳旦先等一百三十四名先後拏獲俱應照律不分首從擬斬立決原任茶陵州知州趙國瑄因私派激變應照律擬斬監候失察總督李輝祖應降三級調用巡撫楊鳳起已經別案革職無庸議得旨黃明陳丹書吳旦先等三十八名俱著卽處斬華皮臣等九十六名從寬免死照例減等發與黑龍江新滿洲披甲之人爲奴趙國瑄私派激變之處著行文湖廣總督郭琇查明再議李輝祖等處分尙輕

著一併再議具奏○乙卯 上駐蹕遙亭諭所過莊屯捕蝗○戊

午以溫達爲戶部右侍郎

由內閣學士遷

○乙丑以滿篤爲內閣學士

由內閣學士遷

閣侍讀學士遷

八月己巳遣官賑巴林饑仍遣官撫養如敖漢例○甲申 上駐

蹕齊老圖昂阿賜喀喇沁等王貝勒貝子公額駙台吉等銀幣衣

帽鞍馬○乙酉 上駐蹕瑚爾希勒畢喇賜隨圍蒙古官兵銀幣

○丁亥以祖文明爲福建布政使

由四川按察使遷

○諭吏部淮安揚州

所屬被災地方甚爲緊要府州縣員缺俱著奏聞選擇補授○是

月免江南天長浙江西安江西建昌湖廣華容等十縣水災額賦

有差

九月丙申朔以李興祖爲四川按察使

由雲南永昌道遷

○戊戌裁四川

陝西督標火器左右二營守備一千總二把總四兵八百名歸併

一營仍名爲火器營增參將一停止陝西廣元戍防官兵裁督標

五營兵丁一千名每營額定八百名○癸卯以王然爲山東按察

使

由江南驛
鹽道遷

○乙巳 上還京師○丙午諭宗人府敏妃喪未滿

百日誠郡王允祉並不請旨卽行剃頭殊屬無禮著收禁宗人府

嚴加議罪辦理王府事務官王府長史等不行規諫甚屬可惡將

伊等鎖拏從重治罪尋宗人府議奏誠郡王允祉應革去郡王爵

辦理王府事務侍郎綏色辛保王府長史馬克篤一等侍衛哈爾

薩等俱應革職枷號三箇月鞭一百不准折贖得旨允祉從寬革

去郡王授爲貝勒辛保馬克篤哈爾薩俱著革職鞭一百准其收

贖綏色自任侍郎以來實心效力著從寬免罪革去管理王府事

務○戊申諭大學士等各省採買物件科派累民不若折色解京

官買總之累民之事雖纖毫亦不可行向日口外蒙古窮困人不

聊生朕近年來遣人經理多方撫育培植之今已家給人足樂業安生可見治民之道全在休養也 上以于成龍所繪河圖示大學士等諭曰今四海太平最重者治河一事朕前巡視知水之不治由洪澤湖水勢甚大既不能洩又加黃運兩河合併勢愈浩瀚以致泛溢昔時原有歸仁隄遙爲捍禦此法最善今已淹沒不可考靳輔則築減水壩名爲減水而四處奔瀉漂決甚多彼但顧上河而不顧下河水何以治朕意惟有導河稍北使彼不得侵入清水而疏洩洪澤湖使之下流全用清水以刷沙淤如此則水自無不治矣今歲南巡見黃河逼近清口黃水倒灌以致淤墊洪澤湖水不出自高家堰減水壩流入高寶諸湖自高寶諸湖流入運河以致下河田地盡被淹沒淮揚所屬錢糧雖頻年蠲免賑濟動帑修理隄岸羣黎尙在水中朕深爲軫念遂諭于成龍將洪澤湖出

水隄岸令速完工近差工部官員往看清口仍然淤墊洪澤湖水
仍未出口隄岸尙未告竣清口甚爲緊要如不將清口挑濬湖水
不出高家堰併運河隄工雖加高厚均屬無益爾等會同九卿詹
事科道詳閱河圖速議具奏尋大學士等奏曰 聖諭河工事宜
已極周詳應遵旨移文河道總督于成龍令速行修濬 上曰靳
輔董安國于成龍但知築隄禦水至於改河身使北俾清水通流
並未言及若不令清水通流雖修築隄岸黃水終致倒灌焉能禦
之○諭吏部比年內升官員少京堂懸缺者多翰林官甚眾升遷
壅滯爾等將見出京堂之缺及翰林官職名一併開列○癸丑以
吳赫爲刑部右侍郎由原任四川陝西總督遷○丙辰 上御經筵○戊午諭
大學士等大學士阿蘭泰效力年久品行清純辦事敬謹朕頃聞
其病篤先遣皇長子允禔往視朕尙欲親臨其第及允禔回奏業

已昏迷隨聞溘逝朕深用震悼卽遣皇子允禔等往視含殮大臣
病故雖無輟朝之例朕心不忍可特停辦事一日著馬武同內大
臣一員侍衛十員往奠茶酒賜鞍馬四匹銀二千兩至發引時皇
子允禔允祐乾清門侍衛十員並五班侍衛往送尋予祭葬加祭
一次諡文清○諭理藩院他旗蒙古朕遣官養育俱各得所惟蘇
尼特四子部落吳喇忒毛明安等旗分尙有貧人爲盜其速爲撫
養之○庚申轉田雯爲戶部左侍郎調李枏爲戶部左侍郎管右
侍郎事轉顧藻爲工部左侍郎以吳涵爲工部右侍郎由左副都御史遷
○癸亥大學士等奏臣等遵旨會議行查明代後裔俾守祀事但
明亡已久子孫湮沒無聞今雖查訪亦難得實臣等愚見卽委該
地方佐貳官一員專司祀典以時致祭從之○是月免直隸安州
湖廣安鄉等五州縣水災額賦有差

冬十月丙寅以王紳爲左副都御史

由大理寺卿遷

○己巳諭大學士等

凡上司居官有聲者其所舉之人必佳上司不善則所舉者亦屬庸劣然有所居官先優後劣者亦有居小吏善而升遷後改變者若始終如一行止不改者不多得也○壬申以努赫爲禮部右侍

郎

由光祿寺卿遷

○癸酉諭大學士等江蘇巡撫宋犖奏請蠲免高郵等

被水州縣雜項錢糧此必前次蠲免時遺漏未奏依該撫所請全行蠲免朕見他處被災者尙好惟下河附近之地連年水淹俱由清口之清水不得出黃河之濁水逆流入洪澤湖之故朕憫念民田晝夜勤思必使清口之水得出黃河從別道流出則民生始獲利益也○命原任河道總督王新命管理永定河工○甲戌上巡視永定河啟鑾○乙亥上閱北蔡村夏莊村南蔡村等處諭王新命等曰於此三處從上流作挑水壩不必過長長則大溜爲

其所偪對岸淤處畧加挑濬水卽瀉入直流矣著俟明春興工又諭官不清則爲民害水不清亦無利於民天下之濁者皆如此也不清之官朕有法以正之不清之水朕有策以治之○丙子上巡視霸州河隄居民跪迎道左上顧百姓曰朕不辭寒冷來巡河隄特欲拯救爾等耳居民叩頭謝恩歡聲動地上閱南格驛曹家務郭家務等處舊河口諭王新命等曰此舊河口著修一長釘頭壩堵塞之若留此口水得灌入則河卽爲其所奪矣舊河近隄汕塌者著加幫增築上至郭家務村南大隄以豹尾槍立表於冰上親用儀器測驗諭王新命等曰測驗此處河內淤墊較隄外畧高是以冰凍直至隄邊以此觀之下流出口之處其淤高必甚於此如此壅滯安能暢流此等隄工卑矮可虞若不豫行修築明春水發難以堵禦必自今冬下埽加幫增高不可取近隄之土

若取土成溝水流溝內有傷隄根○諭直隸巡撫李光地等永定河自郭家務以下河身淤高若挑淤作河恐虛費錢糧無益於事且隄內之地較河身最窪若將南岸之隄作北岸之隄前挑窄河築高大之隄偏河南移方屬有益這挑河築隄或修石隄之處李光地王新命同分司朝琦估計仍將挑濬舊河之處一併估計尋直隸巡撫李光地等奏臣等遵旨會查自郭家務至隄盡處共長七千七百四十丈應挑河面寬十三丈底寬八丈深一丈築南岸新隄底寬六丈頂寬二丈高一丈二尺從之○丁丑 上回鑒閱張家莊北格驛石佛寺等處隄工諭王新命等曰攔截淤灘下埽時必斟酌恰當儻稍有參差則水不入而功徒費矣○戊寅 上閱莊戶村求賢莊等處隄工諭王新命等曰此河儻有坍塌汕刷之處俱須下埽至南岸夏莊水溢之處與舊河相近關繫緊要令

豫備物料於桃汛未發之前敬慎堅修 上閱趙村新開河諭王
新命等曰此處圍裝碇石稍低著再增加使高 上駐蹕南苑○
己卯武英殿大學士李天馥卒遣大臣侍衛奠茶酒予祭葬諡文
定○庚辰 上還宮○辛巳直隸巡撫李光地原任河道總督王
新命等將修永定河摺子呈覽 上曰爾等意欲如何王新命奏
曰欲於南面遙隄之內修治若向外面修治恐有礙居民村莊
上曰若遙隄之內修治俱是沙地儻更壅淤則低窪村莊盡在沙
中矣今永定河郭家務以下壅淤已高出七八尺若掘畢方濬河
身不但多需工力必致歲歲壅淤南隄之南地最窪下若隨其窪
下濬治於掘出之土卽行釘椿築隄堅固則修理最易抑且北隄
三層於河更屬有益爾等修理時可將河口修窄漸次放寬於兩
邊築隄使高大則水勢迅急沙自不至於停住矣若遇村莊相近

處宜詳視妥當委曲遠移或砌之以石與村居無礙始行修理俟
新修河工告竣朕親臨視開放河水○癸未諭大學士等原任河
道總督董安國所濬引河及挑水壩著發正項錢糧修理給事中
張睿條奏中河之水由仲家閘口流出直射湖口故不但清河之
水難出而黃河之水反易流入所言甚是今于成龍但以修築隄
工爲務不以決出清河之水爲要爾等再議著于成龍親至仲家
閘詳視議奏尋大學士會同九卿等議覆張睿所奏應令于成龍
等將仲家閘以下挑濬出水或將董安國所挑引河以下酌量挑
挖建閘詳看具奏從之○諭大學士等朕撫御寰區愛養兆民務
期人各得所比年淮揚所屬地方罹於水患百姓田廬俱被淹沒
生業蕩然深切軫念屢經蠲租賑濟乃黃河墊高清口低下淮水
不能流出百姓仍被水災念此淮揚數州縣生靈豈可不急爲拯

救乎今或堅修高家堰隄岸以束淮水使之刷黃或移清口於清江浦之左右或另濬河道以通舟楫俱宜一一講求此事關係甚鉅爾等會同九卿詹事科道細閱河圖詳議具奏○丁亥九卿遵諭議覆河道總督于成龍等奏運河乃糧艘經由要津爲下河七邑上游更兼高家堰六壩流出之水盡入於此水勢浩大河窄難容前河道總督靳輔於高郵南北建設大小減水壩五座雖隄岸保固無虞而下河諸邑均受水患 皇上南巡閱視令臣等大修隄岸堅閉減水壩下河麥禾幸得收穫茲遇伏汛水發致高郵邵伯等處皆被漫決臣等酌開減水壩二座上下隄岸方得保全總緣高郵河身與山陽寶應河身相等驟乘高郵寶應諸湖之水開壩則有礙於民田閉壩則有傷於隄岸請將高郵減水壩改爲滾水石壩水長聽其自漫而保隄工水小資其涵蓄以濟運道又茆

家園等六壩亦請改爲滾水壩其式與歸仁隄五堡滾水壩相同至高家堰一帶石工年久坍塌請通行加高五尺以免歲修均應如所請從之○是月免直隸宣化雹災霸州保定及江南高郵湖廣沔陽等十三州縣水災額賦有差

十一月丁酉御史鹿祐奏參順天鄉試正副考官修撰李蟠編修姜宸英等以賓興論秀之典爲縱恣行私之地實爲有玷清班請立賜罷斥上諭大學士等順天鄉試中式者童稚甚多物論騰沸大殊往昔考試係國家大典所當嚴飭以示儆戒御史鹿祐奏參可嘉著九卿詹事科道會同將李蟠等嚴加議處○己亥諭戶部淮揚仍歲水災百姓阡陌於死亡朕惄然傷之河患不除夙夜不能暫釋被水之後存者必至流移田多不耕賦安從出其海州山陽等十州縣衛明年稅糧可悉行蠲免以副朕拯恤災黎至意○

以馬齊爲武英殿大學士

由戶部尚書遷

佛倫爲文淵閣大學士

由禮部尚書遷

熊賜履爲東閣大學士

由吏部尚書遷

張英爲文華殿大學士

由禮部尚書遷

○

調席爾達爲禮部尚書仍署四川陝西總督以馬爾漢爲兵部尚

書哈雅爾圖爲左都御史

由內務府總管遷

○調陳廷敬爲吏部尚書李

振裕爲戶部尚書以王士正爲刑部尚書王澤宏爲左都御史

由吏部

部左侍郎遷

○調杜臻爲禮部尚書以范承勳爲兵部尚書

原任江南江西總督

○庚子裁兵部督捕衙門督捕事務歸併刑部管理以裁缺督捕

侍郎朱都納爲兵部額外侍郎喻成龍爲刑部額外侍郎○壬寅

諭大學士等御史等官啟奏會議事常隨班奏對給事中等官無

常啟奏之事有經年不見者嗣後著滿漢給事中各四員在起居

注官下侍班又諭各部院設蒙古司官並無所辦之事俱著解任

候補理藩院員缺○諭戶部湖南地方素稱魚米之鄉比年雖年

穀順成而民間猶未盡充裕是用格外加恩所有康熙三十九年
湖南所屬地丁雜稅等項錢糧著一概蠲免該督撫徧飭所屬實
心奉行以副朕愛民如子至意○除浙江鄞縣沿海衝決田地額
賦○乙巳諭大學士等于成龍奏稱清江浦西界黃水高於淮水
一尺淮水高於運河之水七尺運河之水高於平地七尺合而觀
之淮水高於運河西隄外平地共一丈四尺今惟以清口自河之
下流沿武家墩由清江浦之北另行改移中間河身量留八九十
丈空地兩旁堅築石隄俾清水暢達此所當急議者夫清水建瓴
迅下則易出黃水不致倒灌其石隄之間已爲河身不煩挑濬卽
水漲之時其高下不過等於運河安能泛越高家堰哉但如是改
移朕恐別有所礙不能永遠故少爲躊躇耳爾等確議具奏○九
卿遵諭議覆河道總督于成龍等奏邵伯更樓高郵九里等處漫

缺臣已令該管官先將高郵九里缺口堵築其邵伯更樓缺口舊有涵洞隄內原有河形請疏挑寬深於河東築成土隄束水南下入江可洩運河驟漲之水以固東西兩岸隄根再查運河一帶河身墊高皆因高家堰隄工未完黃流倒灌清口淤塞湖水不出之故今先挑挖爛泥淺等處引水敵黃以濟運河如高家堰一帶工程告成則清水自出矣均應如所奏作速挑濬修築完工至上諭或堅修高家堰隄岸以束淮水使之刷黃或移清口於清江浦之左右或另濬河道以通舟楫之處應令該督等親勘速議具奏得旨河工關係重大高家堰隄岸縱多方堅築清水亦不能出今惟當議移清口於他處兩岸俱用石工堅砌使清水流通朕南巡時曾以另開清口面諭于成龍彼亦奏稱淮水可從武家墩向清江浦移改此事著于成龍及徐廷璽會同河道各官親看清口當

移於何處卽行詳議於歲前具奏○河道總督于成龍以病乞假調理得旨于成龍准給假兩月調治河工事務著徐廷璽暫行署理其緊要事宜仍與于成龍商酌而行○令寶源局收民間廢銅充鼓鑄○丁未諭大學士等河圖繪於紙上平漫難辨高下朕欲改清口刻木製成一圖觀看易明著侍郎常綬前往河工會同于成龍將清口應否改移詳加看閱歲內著速回具奏○九卿遵旨磨勘順天鄉試中式舉人試卷並議覆御史鹿祐奏參考試不公一案擬將順天正副考官李蟠姜宸英等革職 上諭大學士等此科考試不公已極且聞代倩之人亦復混入科場大典豈宜如此此案若照議完結仍不知倣著將所取舉人通行齊集內廷覆試如有託故不到者卽行黜革其考官等處分俟覆試後具奏○

戊申 上謁 陵啟鑾○壬子調佟毓秀爲江蘇按察使以何顯

祖爲貴州按察使

由福建驛傳道還

○癸丑

上謁

暫安奉殿

孝陵

至 仁孝皇后

孝昭皇后

孝懿皇后陵奠酒

○是月免直隸

玉田江南邳州等十八州縣水災額賦有差

十二月乙丑朔予故原任禮部左侍郎嚴我斯祭葬○戊辰 上

還京師○刑部奏湖廣總督郭琇遵旨查參審理茶陵州叛案郎中剛五達等忒肆橫行擾害地方俱實請旨定罪 上諭大學士

等剛五達陞辭朕曾諭云爾係部院保舉賢能他日乃上進之人此行須從公審理斷不可顛倒是非儻仍行妄亂決不輕恕今肆行無忌不加重治何以懲儆著將剛五達等交刑部等衙門嚴加議處尋刑部等衙門遵旨察審剛五達應擬絞監候秋後處決

上曰若輩卽當正法以示懲戒何待秋後也著再議○庚午轉王掾爲吏部左侍郎調韓葵爲吏部右侍郎以李錄予爲禮部右侍

郎由內閣學士遷

○辛未諭大學士等每年所買皮張儘足供用多買亦

奚用耶卽如朕內用沈香每年二百斤用尙有餘今辦解者已過

數倍此等物件俱令察明量用採買其餘無用者悉停之○調常

綬爲刑部左侍郎管右侍郎事轉羅察爲工部左侍郎調倭赫爲

工部右侍郎

由刑部右調

○癸酉諭吏部凡奉差官員理宜恪慎潔己辦

理公務事竣卽行覆命庶不負委任之意嗣後如巡鹽權稅審事

一應差遣各官儻有沿途騷擾繞道妄行或公務已畢仍逗留地

方借端生事或將所帶筆帖式撥什庫等私自遣往他處督撫卽

指名參奏以憑究治如督撫瞻徇容隱不行糾參事發一併議處

○乙亥諭大學士等比年未經京察是以各部院衙門官員行止

維亂才力不及怠惰偷安者甚多著傳諭部院衙門令各察明五

日內卽行參革○以范承烈爲內閣學士

由內閣侍讀學士遷

○己卯兵部

議准湖廣總督郭琇奏鎮筰協紅苗跳梁截陷弁兵臣等見在設策勦撫謹酌善後之計莫若移鎮防險查沅州鎮標兵一千九百五十名此地往來大路無甚險僻請將沅州鎮總兵官改爲鎮筰總兵官帶本標將弁及兵一千名移駐鎮筰合鎮筰協原存兵一千一百名共二千一百名卽將鎮筰協副將改爲沅州協副將亦帶標員移駐沅州統領沅州存兵九百五十名酌分汛防從之○庚辰御史廖騰燧奏參安徽巡撫李鈞以久病殘軀曠誤職守應令休致得旨著李鈞明白回奏○辛巳查勘河工侍郎常綬等回奏上曰爾等帶去改移清口河圖伊等云何常綬奏曰于成龍等云遵旨改移清口則清口自是易出但水泛時兩邊隄岸僅致衝決保護爲難將高家堰減水壩堵塞加幫修築似有裨益上諭大學士等于成龍等之意以爲改移清口清水固宜宣洩遇水

泛時新修隄岸難保無虞必將高家堰減水壩盡行堵塞而加築之始有裨益洪澤湖原係陸地前人於此築隄蓄水與山東嶧山湖南旺湖相同大水之年納之以蓄水大旱之歲出之以助運彼時河身窪下故洪澤湖水一則敵黃一則濟運今歲久沙壅黃河底墊不但黃水反高於清水清水勢不能出而黃水復致倒灌於是洪澤湖底亦漸淤墊高地丈餘水面上浮矣此清口所以淤塞也爾等會同九卿確議各陳己見直言無隱○壬午諭大學士等元旦祫祭 奉先殿捧請 四祖神牌往來朕心不安爾等會同內務府禮部太常寺考明代典禮議奏尋大學士等議奏臣等查考明代典禮並無捧請牌位之儀我朝建立 奉先殿於大內奉太祖 太宗 世祖神主者蓋欲於朔望薦新及隨時祫祭故也 四祖神主舊奉於 太廟後殿每時享致祭且歲暮又有祫

祭元旦復請神牌至 奉先殿合祀未免重複嗣後遇元旦 皇
太后聖壽節 萬壽節於 奉先殿行禮時停其請 太廟後殿
四祖神牌卽於 太廟後殿照 奉先殿典例遣官致祭則
四祖牌位不至往來捧請而我 皇上誠敬之心亦允愜矣得旨
是○大學士等會議河工事務入奏 上問曰爾等作何會議伊
桑阿奏曰將清口改移武家墩甚善但新築隄岸水泛時似難保
無虞今給事中陳詵以深濬河身爲要繕寫摺子呈覽 上曰河
身宜加深濬人所共知但難得法耳朕亦留心於此今永定河雖
小彷彿黃水欲以水力刷濬之法試之使河底得深十月間往視
之時曾諭李光地等令將河身束之使狹堅築兩邊隄岸若永定
河行之有效卽將此法用之黃河否則另當設法安可輕舉九卿
內如有淮安揚州人令各抒所見奏聞侍郎李杻奏曰 皇上欲

改移清口誠爲善策但不加修高家堰隄恐高家堰之隄一決則淮安揚州一帶難保無虞請將高家堰隄工速加增修 上問曰高家堰若行修築水漲時泗州一帶得無虞乎李榕奏曰高家堰一行加修水漲時泗州一帶必稍有水患但淮安等處地方所關最要 上曰洪澤湖之水長勢不得不將高家堰增築待加築高家堰後試觀清水由清口出否至於邵伯衝決之口若不豫行修築則明春更可慮矣又諭大學士等曰若將高家堰減水壩堵閉建造滾水壩土隄加幫高厚則湖水必高黃水又大湖水不出之時高家堰隄工危險而泗州等處必致水淹爾等會同九卿詹事科道確議具奏○乙酉 上幸南苑行圍○九卿議覆左副都御史梅鋐奏會試定例分南北中卷後又於南北中卷之內各分左右以致閱卷者不盡衡文止算卷數以定中額請仍照定例止分

南北中卷概去左右名色應如所請並將江南廬州等府滁州等
州舊係中卷者俱歸南卷其雲南貴州四川廣西四省去其中卷
名色每科雲南定爲雲字號額中二名四川定爲川字號額中二
名廣西定爲廣字號額中一名貴州定爲貴字號額中一名康熙
三十九年會試恩詔加額應將雲南四川各加中二名廣西貴州
各加中一名從之○九卿遵諭議覆侍郎常綬等奏臣等遵旨前
往河工詳勘擬將清口改移於武家墩但見今物料未備明年雨
水前不能完工漕運甚屬緊要雖改移清口其高家堰亦必須加
幫應如所請將高家堰速行加幫高厚並挑挖引河二道遣部院
堂官督催至邵伯更樓高郵九里等處決口至今尙未堵塞完工
此亦關繫運道亦應差部院堂官督催作速完工得旨依議這督
催工程著范承勳王鴻緒王綬田雯布雅努喻成龍顧藻壽甯王

紳高裔去分修工程董訥王樑朱宏祚江有良王起元宮夢仁線
一信陳汝器王日藻衛旣齊李應薦馬世濟高承爵金錫楊雍建
去○庚寅 上還宮○是月免浙江餘姚等四縣水災額賦○是
歲朝鮮琉球入貢○人丁戶口二千四十一萬八百九十六田地
山蕩畦地五百九十八萬六千八百八十五頃三十四畝有奇徵
銀二千七百三十九萬九千五百五十八兩有奇米豆麥六百九
十六萬八千五百六十三石有奇草二百八萬一千六百六十六
束茶十五萬七千四百五十四引行鹽四百三十一萬九千三百
八十五引徵課銀二百六十九萬五百九十三兩有奇鑄錢二萬
三千八百六萬五千四百有奇

東華錄

康熙六十五

臣王先謙敬編

臣周瀚蕃恭校

康熙三十九年庚辰春正月壬子四川提督岳昇龍密奏巡撫于養志凶殘愷刻暴戾乖方交結藏番賄棄疆土剝削商旅苛虐土司私收雜派勒索屬員規禮各種婪贓計十六款得旨四川巡撫提督已經補授于養志岳昇龍卽離任赴西安其本內事情著該督審明具奏岳昇龍將不應密之事密陳殊屬不合著一併察議具奏○丙辰工部議覆御史廖騰燧奏原任河道總督董安國糜費歲修及各案大工帑金不下四五百萬于成龍任內又幾及二三百萬河工無一案報竣追賠各款亦無一案還項請嚴定考成酌立期限應將管河各官俱革職勒限半年賠修其分管道官各

降四級督賠工完開復如限內不完將承修官革職分管道官降四級調用總河降一級留任未完工程仍令賠修追賠銀兩亦勒限半年如限內不完分管道官不行揭報總河不行奏參照徇庇例議處又奏稱修工人員雖有一定丈數然地名繁雜必盡一定界表以石椿庶免推諉應如所請令總河將見今所修隄岸於接連交界之處各立石椿上鐫號數下鐫修理人員姓名其舊隄岸鐫舊隄字樣亦立石編號從之○丁巳 上以巴林淑慧長公主薨諭曰公主係朕之姑 太皇太后在時公主特蒙眷愛因此託朕朕亦面允公主待姑年邁時迎至京師凡一切應用之物朕皆承理以終天年及公主病篤見朕親臨視疾含笑而逝病篤之人朕見者亦多矣如此含笑而逝者從未一覩公主生逢泰運居蒙古地方五十餘載毫不生事躬享高年子孫繁盛含笑長逝諸福

備矣朕歎悼之懷因少解焉○禮部議准御史李先復奏科場內
簾宜復設滿漢御史各一員糾察從之○戊午以湖北湖南錢多
壅滯價低命暫停鼓鑄○禮部奏朝鮮國王李焞奏本國薩厄等
船隻被風漂至琉球琉球國將薩厄等解京師奉旨發回本國今
遣使進謝恩禮物應送內務府查收得旨朝鮮人民被風飄流朕
一體軫恤令回本國這謝恩貢物不必收嗣後因此等奏謝著停
其進貢禮物○辛酉差往陝西審事尚書傅臘塔江南江西總督
張鵬翮回京入奏 上曰爾等所審之事著交九卿議奏問張鵬
翮曰署總督事席爾達居官如何張鵬翮奏曰居官頗優 上又
問巡撫貝和諾較巴錫何如張鵬翮奏曰巴錫爲人鄭重貝和諾
臨事精詳 上謂大學士等曰張鵬翮前往陝西朕留心察訪果
一介不取天下廉吏無出張鵬翮右者○覆試順天中式舉人○

壬戌諭大學士等昨覽覆試之卷今科鄉試誠不允當派出監試閱卷諸臣亦甚懦弱諸臣不擬題改奏反強請朕命題又謂所學疏淺其試卷亦屢請朕定其優劣朕不允行仍令諸臣較閱諸臣尙懷顧忌不分滿洲漢軍及南北卷總合一處定其次序朕以爲宜按項定其差等況諸臣俱係制藝出身之人而寥寥數卷反不能較閱耶朕於諸事惟期合宜耳雖宗室大臣之子豈肯徇情諸臣有何畏忌卽今鄉會科場俱遣官考試朕何嘗主事此試卷朕亦大畧閱過爾等持出傳諭九卿科道齊集詳閱具奏○癸亥上以巡視永定河啟鑾

二月乙丑朔奏事主事存柱捧出康熙三十八年中式舉人覆試文卷傳諭大學士等曰此科中式舉人因有情弊爲人指參朕亦聞外議紛紜故行覆試以驗其實朕親命題特命皇子重臣侍衛

嚴加監試朕初謂必有不能終卷者及閱各卷俱能成文尙屬可
矜至於落第者在外怨謗勢所必有焉能杜絕諸生試卷著學士
布泰齋回將朕此意傳諭九卿卽於九卿前啟封照所定等第繕
寫進呈又命中書班第傳諭曰朕棄時文已久覽今文體較前稍
變諸生試卷朕一一觀其大畧諸臣所擬等第俱當三等以上者
皆可觀有在三等朕拔置二等者亦有在四等朕拔置在三等者
四等果屬不堪著令黜革三等以上者仍令其會試○是日 上
閱化家口攔河壩諭監修內閣學士范承烈曰化家口攔河壩之
南築一月牙壩壩基須用排椿蘆埽庶於舊隄有益至於舊河下
流之口亦須堵塞若不堵塞則水漲之時必致倒灌有損河道○
丙寅 御舟泊武清縣蔡村諭工部尙書薩穆哈曰觀耍兒渡之
東被水衝刷深爲可虞若不豫築挑水壩必致潰決著備椿埽等

物朕卽親臨指示修築○丁卯 上閱筐兒港衝決之處諭工部
尚書薩穆哈曰今從衝決處挑濬新河直抵南河著修築重隄河
身須深一丈寬或十丈或二十丈酌量開濬舊河故道不必堵塞
水漲時聽其兩支分流其迤東轉灣處築一挑水壩高五尺以禦
激衝甚有裨益再續修一順水壩此等若待賠修必致遲延著動
正項錢糧派出賢能司官筆帖式監修催趨限於四月內告成○
庚午命甘肅每年應辦皮張仍令該撫辦解停差部員○辛未
上乘舟至靜海縣東閱子牙河隄問河道分司朝琦曰此河從何
處開濬朝琦奏曰從閭留二莊之間開濬四十里兩岸築隄導水
入三角淀 上曰此河一開水勢盡向東流不由故道恐有妨於
運河也○壬申 上閱子牙河畢回舟復至王慶坨命侍衛海青
傳諭巡撫李光地曰新開子牙河與運河逼近今若從東隄閭留

二莊之間另開一河分流導入三角淀則偪運河愈近儻水勢泛溢致損運河隄岸深爲可虞朕視王家口出水之處並無壅塞於見開河處或應建閘或應築壩之處爾等繪圖進覽○甲戌諭巡撫李光地等曰閘留二莊之間可建一石閘水大時酌量開閘減洩水小時閉閘仍由王家口舊河令直流出則水勢不至盡行旁瀉漕運民田皆有裨益矣諭畢往閱永定河修築之處又問李光地等曰開此河水盡向東流恐有妨於運道李光地等奏曰聖諭建閘甚是此閘卽令巡道劉德芳監築多用石板務期堅固上逐一指示河工畢諭曰修築方畧皆朕親行指授若事有參差俱在朕躬爾其盡心修理勿懷疑懼以朕觀之永定河下流自三聖口開至柳岔無有善於此者上減扈從王大臣侍衛乘小舟往閱郎城柳岔等處遇水淺舟不能進上卽改御小艇盡留諸

大臣侍衛止率數人前往指授河道應從何處修築方畧逐一明訓河工諸臣○乙亥諭大學士等朕往閱永定河見河上諸員深屬不堪彼等並無知曉每引朕至淺處舟淤難行問之土民亦不明奏後發嚴旨以懼之始引前行及至閱看工程甚易並無難處因朕指示周詳河工諸臣方悟而大悅朕御小艇入郎城等淀淤淺之處徧視之則河之當移於柳岔也並無疑矣郎城之河全被沙淤而墊高至來年可耕爲田而欲於此處出水直強之耳水口所關重大若非親臨目擊可輕斷乎治河大臣畏縮不前反再三陳奏以爲不可行者今復何辭又諭曰郎城之遙隄甚有用清水渾水俱以此當之新河開畢著卽完工南北兩岸遙隄完工之後交地方官各自分守稍有損壞處用民夫補修著傳諭直隸巡撫李光地朕將於四月來臨且不時遣人察視爾等敬慎毋忽 上

又閱郭家務以下被淤卑矮隄工諭曰水長則新開之河可虞爾等會同王新命作何酌量再行加幫增高著公閱議奏○辛巳

上還次南苑○吏部議覆湖廣總督郭琇奏臣生父郭景昌係卽墨縣學庠生郭爾標並無妻室何有子嗣伊投充黃宗昌家爲僕闔邑共知臣伯父郭爾印無子以臣承嗣於康熙十五年正月病故有丁艱呈詞可查不知佛倫何所聞而無影無稽誣臣欺君冒認祖父濫膺封典擬以革職追奪誥命部臣不俟行查遂立時追繳伏乞 皇上敕問佛倫據大學士佛倫供訪聞郭琇是郭爾標之子又郭爾標造反總兵柯永昇拏獲正法我因郭琇伯父名郭爾印與郭爾標名相類據訪聞具奏今郭琇旣稱伊父是郭景昌並非郭爾標舛錯是實查佛倫前奏止據訪聞奏參並無實據應將從前所追郭琇誥命給還其佛倫等事在赦前應免議從之

○壬午 上還宮○乙酉湖廣總督郭琇陛辭奏曰 皇上命臣選奏丈量地畝官員有武昌道莊摺衡永郴道董廷恩長沙府知府王益增三人才堪委任但湖南民稀地廣所以民或不能完課遂致逃避者有之清丈之後則錢糧似較前差減矣 上曰約減幾何郭琇奏曰大約減十分之二 上曰果於民有益所減雖倍於此亦所不惜若不清丈以荒田著落他人徵收錢糧有累窮黎斷不可也此事綦重保奏丈量官員爾具奏來照所請行○江蘇巡撫宋犖以賑濟淮揚饑民米石奏聞得旨朕發內帑修理各處隄岸總爲下河民生起見河工一日不竣下河之民一日不得樂業朕甚惻然今歲漕運可截留二十萬石交付宋犖備賑○壬辰貴州省城地震○九卿議奏差往湖廣審事之郎中剛五達宋超故違 聖訓在地方貪取財賄剛五達宋超應革職擬絞立決筆

帖式舒里渾應革去筆帖式擬絞立決編修喀爾喀雖係差去學辦事之官但受地方官盤費銀兩馬匹等物應革職至陳丹書等各犯謀叛侵犯城池傷及官兵劫奪印信倉庫總督李輝祖不據實奏參應將原任湖廣總督調補刑部侍郎李輝祖革職原任茶陵州知州趙國瑄私派等項應移咨該督查明到日再議得旨剛五達宋超舒里渾俱改爲應絞著監候秋後處決喀爾喀李輝祖俱著革職餘如議

三月甲午朔 上御經筵○原任河道總督王新命以修理永定河繪圖呈覽 上披閱指問良久顧王新命曰此圖曲折闊狹與河形不符如一百八十丈爲一里則一尺爲丈或以寸爲丈更或以分釐爲丈尺量其遠近按尺寸繪之方與河形相符一覽了然今爾此圖皆意度爲之未見明確著另繪圖呈覽○左通政張格

等以差往審理蒿齊忒等旗盜案並教養蒙古請訓 上曰蒙古性情怠惰愚蠢貪得無厭不可以內地之法治之順其性以漸導方能有益初到時亦不可卽行給助始若過優恐後不繼宜視其困乏漸行補助且蒙古惟信喇嘛一切不顧此風亟宜變易儻喇嘛等有犯法者爾等卽按律治罪令知懲戒○吏部奏御史廖騰烽奏參安徽巡撫李鈞病不能辦事今李鈞回奏自稱病愈應交江南將軍提督查明具奏 上諭大學士等各省將軍提督向不與民事敕書開載甚明從無行查總督巡撫之例今議令將軍等查明殊屬不合爾等嚴飭該部其李鈞事著江南江西總督張鵬翮查奏○禮部議准御史鄭惟孜奏奉差審事官員宜給印信應准行得旨凡差遣審事官員若另給與印信甚滋煩擾不必鑄給嗣後審事官員定擬審結卽於疏內寫明具奏日期鈐本用督撫

印事關督撫則鈐藩臬印事關督撫藩臬則鈐提鎮印○乙未命截漕米二十萬石賑淮揚○丙申九卿等會議傳臘塔張鵬翮察審陝西散給籽種等案查籽粒銀兩共計五十餘萬此內給發民間三十九萬餘兩百姓已於三年內完過二十六萬兩餘銀限二年內陸續完結其原任同州知州蘭佳選蒲城縣知縣關琇韓城縣知縣王宗旦俱侵扣籽粒銀入己應擬斬監候朝邑縣知縣姚士塾華州知州王建中已病故無庸議其侵扣之銀俱應照數追還原項至布喀控告總督吳赫等侵蝕籽粒銀兩三四十萬今合計實給眾百姓銀及各州縣衛侵扣那用銀已與五十餘萬之數相符布喀所告是虛但吳赫及原任巡撫黨愛不將屬員侵扣情弊確查奏參均應擬罪查黨愛已經革職吳赫於吳秉謙叩閣案內另議罪應無庸議原任川陝總督佛倫不將各官侵扣那用等

項確查卽列名會奏不合應降四級調用原任西安知府彭騰翺
卞永甯隴州知州王鶴應降三級鳳翔知府許嗣國應降二級俱
調用原任西安知府升神木道李杰降一級留任罰俸一年原任
陝西驛傳道升福建布政使解任張霖補官日降一級罰俸一年
原任布政使戴吞禪布俱身故無庸議前任巡撫布喀擅用庫銀
支給運米腳價查係緊要公務非私自那用免其追取得旨蔭佳
選關琇王宗旦俱依議應斬著監候秋後處決佛倫從寬免降級
調用著以原官致仕餘如議又會議傳臘塔等察審吳秉謙叩闕
一案查吳赫所參吳秉謙剋扣軍需銀兩勒索稅規倉規俱係風
聞不確惟屬官情願送禮收受是實虧空庫銀俱係軍需緊急因
公那用並非侵蝕其用過銀兩交與總督陝甘二撫令闔省文武
官員均賠無著銀一千五十七兩吳秉謙供稱修理文廟及倉廩

渠壩等處但無用正項錢糧之例吳秉謙先經三法司擬斬監候無庸再議其那用銀兩及所得餽送禮銀照數追出入官補項吳赫懷挾私仇捏款誣參吳秉謙有玷官箴應革職依誣告例枷責丁憂布政使能泰按察使鄂海神木道李杰不能審出實情應各降一級調用其餘諸款及吳秉謙所扳吳赫浮開草料價值等事俱虛均無庸議得旨吳赫著革職從寬免枷責餘依議○己亥刑部尚書傅臘塔等入奏上顧侍郎常綬曰爾自任刑部以來甚爲效力各司所辦案件靡不得當較爾在工部時聲望更佳爾惟當堅持此心勤勉不二方善次工部尚書薩穆哈等入奏上曰淮揚一帶百姓久罹水患亟宜拯救此係爾等專責宜各盡力今觀河工諸臣一有衝決但思獲利遲至數年徒費錢糧河上毫無裨益此弊之根皆在爾部卽今河工凡有啟奏惟恐爾部不准行

隨卽遣人營求爾部鮮不受其請託者若此弊不除河工何由奏績薩穆哈等曰臣等自當遵旨竭力嚴禁 上曰豈止嚴禁他人卽爾等亦宜改悔 上諭大學士等曰前者于成龍雖屢陳河務及問自河上來者皆云邵伯決口尙未堵塞朕所指芒稻河人字河等處亦總未修于成龍人尙可用亦有勞績但比年以來徇情爲人大有錯謬朕去年南巡時遣侍衛海青召于成龍至江天寺諄諄訓諭以留心河工爲要務詎意彼竟不言及如何治河如何救民惟以捐納執奏朕以此知于成龍之不能有成於河工也靳輔任總督時河務常治雖下河之人不能無微怨然不可謂於運河無益朕三幸江南初次河道尙未廢壞去年至彼見水勢較前更險聞今歲愈加湧漲直至高郵矣先是桑額疏奏清口之水已向外流朕曾批諭云黃水不久倒灌矣今詢來人果如朕言去冬

朕巡永定河命修挑水壩彼等遵旨修築水得通流于成龍不遵指示故迄今尙未告成爾等將朕所諭修築之處工程完否查明具奏○刑部等衙門會奏侍郎羅察等察審原任四川提督岳昇龍揭參原任巡撫于養志一案查于養志係邊疆大臣私將驛馬撥給裏藏餽送禮物之人又打箭鑪土司蛇蜡喳吧地方被營官占居不行奏明因岳昇龍揭參始將岳昇龍所行事件揭奏殊玷職任應革職其營官霸占作何措置之處應請敕第巴嚴飭互相貿易毋致生事得旨于養志著革職俟岳昇龍所奏二疏川陝總督審結時解送來京將打箭鑪等處被營官占據並不奏明緣由審明具奏其營官占據打箭鑪事情亦著俟該督將營官毆死蛇蜡喳吧之案察明到日一併議奏餘依議又奏羅察等奏審原任四川巡撫于養志奏參提督岳昇龍一案查岳昇龍係邊疆大臣

乃向革職土司高一柱面言我用摺子啟奏令爾戴罪護理希圖
酬謝又給銀與閭國耀等建州販鹽又因茶馬之事指稱部內使
用令屬員議湊銀兩四月初十日發兵至十四十五日始移咨督
撫將伊瘦馬交屬員勒取價值又取各營官隨身兵糧多寡不等
俱玷職任應革職所取兵糧馬價及家人一百五十名不當差遊
擊韋元鼎等家下不當差之糧俱交該部照數追入官閭國耀等
違禁販鹽應擬杖其餘諸款俱虛應毋庸議至打箭鑪係版圖內
地達賴喇嘛妄求鑪河東嘉慶地方殊爲不合但已於岳昇龍參
于養志案內請敕第巴亦無庸議得旨岳昇龍著革職餘依議○
壬寅大學士九卿等會議河工將摺子呈覽 上曰爾等會議以
埽堵塞黃水入清口之處如此則漕艘從何處行伊桑阿奏曰漕
艘到時拆埽爲口以行船過仍堵之 上曰水力蓄聚一去其埽

衝刷必甚衝刷數次水必愈深埽難堅立矣爾等此議未必可行也伊桑阿奏曰臣等未嘗以此爲必可行但無計可施以爲如此僥倖清水可出 上曰如此清江閘亦須堵塞方好又召刑部侍郎常綬理藩院員外郎赫碩滋工部員外郎費養古近前問赫碩滋曰爾等前議高家堰可修及觀王鴻緒所奏又云不可修爾今云何赫碩滋奏曰臣等會同于成龍徐廷璽齊集府廳官員定議乘冬月水退堅築高家堰具奏彼時若卽興工必有成矣今水勢浩大實不可修 上曰去年朕親立河隄諭爾於挑濬引河處定椿汝能有成否赫碩滋奏曰 皇上所示臣已傳諭董安國之子至臣來後不知其作何遵行 上曰朕所遣諸大臣皆以高家堰爲不可修爾尙執以爲可惟以府廳微員爲辭是誠何意朕親指示著爾定椿爾又轉委他人爾所司何事復顧大學士等曰赫碩

滋朕巡視河道會命隨行雖言辭清爽口齒巧利然於正務毫無所濟惟兩可其說卸過於人且自恃利口上司與大臣之權任其擅弄不可令復往河工矣又曰前靳輔任總河十有餘年河務整理但自修歸仁隄之後清水勢弱黃河之身漸高清水不得流出渾水益倒灌清河河工廢壞亦由於此朕此次南巡曾諭于成龍邵伯更樓等隄尺寸皆當堅固彼不堅修以致更樓隄岸衝決今漕臣桑額奏稱漕艘被水損壞二十餘隻究如朕諭常綬費養古速行馳驛前去會同河上諸臣將黃水入清口之處可否用埽堵塞及清江閘口應否閉絕引河作何挑濬更樓決口作何修治詳議速奏毋得稽遲常綬奏曰皇上指示黃河應挑引河築挑水壩此工程於高家堰管工大臣內交何人修造恭請 欽點得旨著差出之范承勳王鴻緒監修令揀選十人帶領修造爾等將邵

伯決口月河芒稻河人字河亦俱聞奏或堵塞黃水入湖之清口或閉塞清江閘之處會同徐廷璽議定卽交徐廷璽修造九卿出上顧大學士等曰赫碩滋惟恃利口大失朕望今於眾前申諭令之自愧耳○癸卯諭大學士等河工錢糧甚不清楚于成龍病故江南江西總督張鵬翮操守好著調補河道總督○丁未諭宗人府簡親王雅布曰宗室覺羅等女有願與朕養者朕可養而嫁之有女年長父母不能遣嫁者朕亦代爲嫁之著查明奏聞○河道總督張鵬翮請訓並奏撤回河工效力人員保請原任河道總督王新命同往 上曰靳輔治河時河道甚好自任王新命後僅守靳輔成績並無別行效力之處于成龍初任總河已將靳輔所修之處改治一二次及至董安國則事盡廢壞不堪矣王新命於河務不甚諳練且見今修理清河四五月間可成待完工日再行

定奪彼處效力官員等撤回張鵬翮又奏曰高家堰宜培修攔黃
壩宜拆毀至疏通海口宜用黃河一覽所載水老鶴等器 上曰
高家堰見在大臣督修爾無與焉海口至清口相隔遼遠今所急
者清黃相會之處最爲緊要黃水高故清水不得通洩以致泛溢
曩者高家堰去水尚遠今與培築隄岸相平但今清水何以得出
河身何以得深此係爾當圖畫效力者更樓口亦屬緊要所宜速
爲修竣水老鶴等物靳輔當時亦曾用之毫無裨益此數事爾到
任詳察宜作何舉行再行奏聞朕以爾清廉因特簡任所發錢糧
仍於河工用之分釐不致空費隄岸自能堅固事無不濟爾行努
力見今錢糧分給各工人員物料尚未運到帑金耗費全無著落
爾到任後嚴察具奏○以特默德爲工部右侍郎由內閣學士遷○庚戌
工部議准河道總督張鵬翮奏請撤回協理河務徐廷璽應令徐

廷璽將伊任內錢糧事件交代明白回京又請撤河工效力人員
應令該督將各官所管工程有無完竣錢糧有無清楚之處逐一
查明卽令發回又稱部臣每事掣肘乞諭部臣寬其文法責以成
功嗣後凡估修奏銷與例不符者具奏駁查若將不應行查不應
駁回之事任意混駁該督具奏到日將本內有名堂司官交與該
部嚴加議處從之○辛亥以覺羅華顯爲內閣學士

由翰林院侍
讀學士遷

○丙辰賜汪繹等三百一人進士及第出身有差○丁巳陝西巡
撫貝和諾奏漢興道所轄地方界連楚蜀幅員遼闊今缺員將議
裁神木道李杰就近調補漢興道卽將神木道歸併榆林道兼理
得旨神木地方朕前統領大兵經過親見田畝瘠薄人民稀少最
爲寒苦然逼近蒙古實屬要地該撫具奏請裁神木道缺今又將
李杰奏補漢興道明係專爲李杰規避見缺希調善地且李杰向

任西安知府並無善狀著將該撫及李杰一併嚴加議處具奏○工部等衙門議准兵部尙書范承勳等會同署河道總督徐廷璽奏高家堰隄工武家墩等處應幫頂寬高丈尺照原估外惟是底寬十丈未免太陂今會議每隄高一丈陂出二丈工力可免虛費其臨湖一面原估概用釘埽臣等公同勘議水深之處仍用椿埽其餘出水之處概用柴草釘鑲用土堅築其小黃莊至周橋已先興築武家墩至小黃莊見在丈分卽日興工周橋至棠梨樹地方有三壩未堵臣等會議先堵茆家園南壩唐埂北壩暫留夏家橋再於棠梨樹以西暫築裏頭草壩以備伏秋漫溢候水消應閉之期堵塞幫築六壩一帶地方最爲危險修防刻不可緩前已分撥河員今著伊等上緊修築務期隄岸無虞從之○是月免江南淮安等三府上年水災額賦

夏四月丙寅吏部議陝西巡撫貝和諾徇情奏請將神木道李杰調補漢興道應降三級調用李杰規避應革職得旨貝和諾著降三級從寬留任李杰著革職○辛未頒 御製臺省箴以儆言事諸臣箴曰臺省之設言責斯專寄以耳目甯取具員通明無滯公正無偏黨援宜化畛域宜捐洞達政體斯曰能賢古昔爭臣風規凜然訐謏譴論垂光簡編朕每覽繹如鑑在懸居是官者表裏方直精白乃心克廣其識國計民生臧否黜陟凡所敷陳敬將悃悃風霜之任以懲奸慝搏擊之威以儆貪墨毋撫細務苟塞言職毋紛成憲妄逞冒臆書思入告當宁對揚沾名匪正營私孔傷或藏嫌怨謬爲雌黃受人指屬尤爲不臧形諸奏牘有玷卑囊職司獻替亟宜審詳敬爾在公風紀嚴廊詞箴用勸誕告聯常○命部院官舉劾屬員○丙子閱河刑部侍郎常綬工部員外郎費養古差

回將河工情形摺奏 上問曰爾等所看如何常綬等奏曰董安國所挑引河已經淤塞臣等遵 皇上指授交與范承勳董訥等令其寬三十丈挑濬極深廣築挑水壩令水循北岸導入引河甚有裨益 上問曰清口如何常綬等奏曰據徐廷璽等云遵 皇上指授暫塞清口將引河挑濬寬深使湖水灌入運河漕船過則啟之過畢仍閉之俟湖水盈溢時開洩以敵黃河之水甚有裨益 上問曰芒稻河人字河如何常綬奏曰芒稻河人字河見在通流○己卯 上巡視永定河啟鑾○諭扈從諸大臣此番行李若仍似冬月按旗分隊伍一處攢行斷乎不可方今天氣漸熱行裝著從容緩進以次隨行慎勿催促不然馬匹必致有損矣行裝可早行朕進膳後啟行有由小路行走者聽其自便毋得嚴禁但曉諭勿得蹂躪禾苗有在後飲水飲馬者亦從其便此時馬匹飲水

並無所忌母似冬月禁止朕巡行每厯寒暑此等事知之甚悉其儀仗侍衛執事人等因馬匹不足騎贏者聽廝役等騎驢者亦聽母恐朕見而不乘騎也近京師天氣炎熱既不行獵乘騎何妨朕不過偶來閱隄耳如此不時巡視監修之人亦自謹慎且悉知河隄諸事其護衛人等雖少懈怠亦不必究其曉諭之○庚辰 上徧視永定河隄駐蹕永清縣北閣驛召大學士馬齊入行宮諭曰朕前者到此曾指示挑濬河灣令其下椿今觀河水已涸乘此水涸之時易於成功其徑直挑濬處須令寬闊卽以所挑之土培築隄岸甚爲有益見無雨水二十日可以告竣目今東作方興夫役難於驟雇八旗並包衣屬下每佐領派護軍各二名驍騎各二名步軍共一千令其挑濬著直郡王允禔總領之並帶世子雅爾江阿僖郡王岳希貝勒延壽公齊克塔哈普奇偕往宗室公內有年

青願效力者亦著帶往都統副都統酌量派往此派遣之事著允
禔會同內大臣公費揚古派遣管轄兵丁酌派章京工部司官派
二員令記工程檔案其章京兵丁須派四十歲以內之人有年老
殘疾者毋得派遣諸凡人員及廢官有願濬河效力者亦令前往
爾明日同允禔赴京師會同大學士伊桑阿部院堂官入旗都統
等會議數日卽帶領夫役前來挑濬其夫役所食二十日口糧及
需鋤橛筐籠等物俱著各佐領備給○辛巳 上徧視永定河隄
諭王新命等曰觀新築大隄裏邊太斗應使稍斜又至郭家務舊
隄新開河口之處用儀器測驗諭曰此處地面較舊河水面高六
尺六寸新開河底較舊河水面深六尺八寸水之入新河也易矣
三聖口至柳岔口地甚卑下見今俱已乾燥此天假機會不可失
也宜乘此時作速完工今若不修以致稽誤日後不得以難修爲

辭至柳岔口又諭曰舊隄大有關繫甚爲緊要稍有所失則誤大事矣此不得委之分司著與來修河之督撫大臣公同看守○壬午 上至王家口登小舟往視子牙河諭直隸巡撫李光地曰此一帶隄岸修築最好朕甚喜悅其流水閘暫停修築於閘之左右濬口洩水視今歲何如明年再定奪○乙酉 上登陸往視 陵寢龍口駐蹕寶坻縣○丙戌諭內大臣等是行特爲修理 陵寢龍口流水之處而來應恭謁 陵寢著公福善率領不隨行之大臣侍衛章京護軍等於龍口聽朕指示修理其行裝令暫留此地俟朕旨再往清池○甘肅巡撫喀拜丁母憂命回旗守制○丁亥 上謁 暫安奉殿 孝陵還至龍口將應行修理挑濬各工程逐一詳加指示令侍衛各官等督率人夫加工並作頃刻告成是日駐蹕薊州清池○戊子倉場侍郎德珠緣事解任○壬辰 上

還京師○調覺羅三寶爲禮部左侍郎以朱都納爲兵部左侍郎

額外侍郎

五月癸巳朔吏部等衙門會議直隸各省督撫奏裁閒冗官員直隸井陘道口北道山東青州道浙江金衢嚴道福建督糧道直隸各省屯都司同知通判布政使司理問都事照磨按察使司照磨檢校都司斷事衛經歷州同州判縣丞府照磨知事司獄巡檢驛丞倉庫大使所官共三百三十六員俱應照各督撫等所奏裁汰得旨口北道缺不必裁餘依議○庚子以覺羅華顯爲甘肅巡撫

由內閣學士遷

○齊世武回京養疾調貝和諾爲四川巡撫

由陝西調

○壬寅

諭宗人府貝子蘇爾發人甚庸劣著降爲公○工部等衙門會議河道總督張鵬翮奏臣過雲梯關閱攔黃壩巍然如山中閒一綫涓涓細流下流不暢無怪乎上流之潰決也於攔黃壩上流相度

計黃河水面寬八十三丈餘攔黃壩亦應照丈尺拆挑一律寬深
万足宣洩查未拆之壩尙有三十七丈三尺應盡拆去挑挖深通
悉與黃河之八十三丈水面相符亟堵馬家港於月內合龍使水
勢不至旁洩盡由正河而行俟黃水長大時將新挑之河始行開
放資其暢流之勢衝刷淤墊則黃水入海自然暢達應如所奏速
行從之又會議張鵬翮奏人字河自金灣閘至孔家壩宜開廣豁
芒稻河兩岸亦狹又有土嶺二處前河臣尙未挖完目今湖水方
盛宜盡行挖去水口下又有芒稻閘年久塌壞宜更修因時啟閉
又鳳凰橋引河從橋口至胡家樓宜加濬深通引水入運鹽河匯
入芒稻河又雙橋灣頭二河底亦有淺處應俟冬時挑深其灣頭
閘座雁翅塌陷宜及時修砌惟高郵自撫軍樓起至東海灣止因
高家堰洪澤湖之水滔滔東下西隄淹沒浸入運河東隄一望汪

洋當伏秋水漲恐東隄單薄難以捍禦宜將見閉三壩相機酌開以保城池隄岸應如所奏速行從之又會議張鵬翮奏清口爲淮黃交界之處目今糧艘北上最爲緊要河身淤墊竟成平陸獨有黃河入運河臣相度形勢博採輿論僉謂黃河比裴家場引河身高爛泥淺係流沙裴家場與帥家場相隔不遠卽開濬深通當黃水長大之時清水不能相敵應於張福口挑引河一道身長一千五十丈面寬十丈深一丈餘或八九尺不等引清水於黃河口相近處入運河使之暢達庶可敵黃並開闢以時啟閉均應如所請從之○甲辰內閣學士錢齊保緣事革職○吏部議覆河道總督張鵬翮奏臣閱視人字河工程安徽巡撫李鈞亦到工所面色黃瘦口角歪斜精力亦未强健不能疾走有病未痊是實李鈞應解任來京調理從之○丙午以法良爲內閣學士

由內閣侍讀學士遷

○丁未

以陶岱爲倉場侍郎阿山爲江南江西總督轉特默德爲吏部右

侍郎由工右遷○己酉調華顯爲陝西巡撫命原任甘肅巡撫喀拜在

任守制○予故河道總督于成龍祭葬諡襄勤○湖廣總督郭琇

奏楚省陋弊一闔邑攤費各里輪當之弊宜除一陋規雜派之多

宜除一徵糧之滾單宜行一訟棍包攬詞訟宜禁一酷刑濫刑宜

禁一誣盜及捕役私行弔拷宜嚴飭一屍親率眾鈔搶之風宜禁

一強族阻葬之風宜禁請旨勒石永爲定例得旨本內事情前任

督撫並未陳奏郭琇莅任實心除弊詳明具奏可嘉著照所請行

○庚戌以高承爵爲安徽巡撫原任廣東巡撫○壬子以白碩色爲工部

右侍郎由內閣學士遷○甲寅以邵穆布爲內閣學士由祭酒遷○己未以巢

可托爲內閣學士由詹事遷

六月癸亥禮部尙書杜臻以病乞休命原官致仕○甲子河道總

督張鵬翮奏臣遵旨看視海口將攔黃壩盡行拆去河身開濬深
通於四月二十一日動工至五月初九日完工開放水勢暢流衝
刷淤沙旬日之間深至三丈寬及百丈有餘滔滔入海沛然莫禦
且自動工之後卽長水二尺以資開放暢達入海此皆 皇上留
心國計軫念民生至誠上孚天心海神效靈之所致應將攔黃壩
之名改稱大通口乞 欽定以垂永久建海神廟以答神庥 上
准奏賜名大通口○乙丑禮部奏御史鄭維孜奏冒籍舉人令其
自首議准行貢監回籍考試議不准行 上曰此二事俱著依部
議主試惟在得人耳若謂貢監在京必生情弊豈令回籍卽不生
弊乎部議不准所奏深爲得宜○諭大學士等前張鵬翮赴任時
朕卽指示以必毀攔黃壩挑濬芒稻河人字河大抵河工事務非
身履其地詳察形勢無由悉知初張鵬翮奏請欲按書上之言試

行修築朕諭云爾身至其地親加詳閱則應修之處便可知矣今
毀去攔黃壩而清水遂出濬通海口而河勢亦稍減觀此則河工
大可望也當于成龍赴任時朕亦曾諭以宜毀攔黃壩誠於彼時
毀去早有效矣觀張鵬翮奏章詞簡而易明其辦事精詳已可知
朕昔與彼閒論時彼曾言在浙八年每歲錢糧並無缺欠今蒙朝
廷擢用之恩無可仰報惟勉令江南錢糧每歲必期完結朕尙止
之云爾勿輕出此言萬一不應後則難矣迄今思之彼固有成見
也○己巳以王澤宏爲禮部尙書李枏爲左都御史由戶部左
侍郎遷○
辛未署四川陝西總督席爾達奏明正長河西土官蛇蜡喳吧被
喇嘛營官喋吧昌側集烈打死應敕第巴拏解並將化林營移駐
打箭鑪以資彈壓部議如所請從之○乙亥以王紳爲戶部右侍
郎由左副都
御史遷○丙子工部議覆河道總督張鵬翮奏請發帑銀一

百萬兩爲辦料趙工之用應移咨戶部就近撥給五十萬兩如果不敷用再將五十萬兩撥給又稱運料必須船隻請先借京口崇明杪船一百隻應准借用又稱請交江蘇江西巡撫動正項錢糧照河工船式共造四百隻發與河工運料查河工額設濬柳船共有六百三十二隻今又借用杪船一百應將造船之處暫停又稱清江浦見有效力旗員擬將船政同知裁去改設理事同知一員揀選滿洲賢能官補授以之審理旗人詞訟捕緝盜賊兼管船政仍屬總漕巡撫管轄應照該督所奏將滿洲應升官員保舉開列引見補授 上諭大學士等今清口已經淤塞來歲糧船難必無誤由海運直抵天津道遠且險若以糧載杪船自江入海行至黃河入海之口運入中河則海運之路不遠按此行可乎伊桑阿奏曰明季清口運艘一過卽行堵塞官船商旅俱於天妃關更船似

此行之不知可否 上曰清口一塞則南北阻絕矣可遣人問張鵬翮明年運艘果否有誤自江南而下運入黃河口果否可行著詳議具奏朕去歲南巡見杪船有未經修理棄置江濱者可遣戶上二部司官馳勘作速修理俟到時將借用杪船之處再議具奏餘依部議速行○工部等衙門議覆河道總督張鵬翮奏修工應用材料轉運維艱舊有運料小河一道年久淤塞應加挑濬深通使於運料武家墩至小黃莊一帶臨河舊有石隄僅出水面二三尺不等必須加砌高郵寶應江都一帶西岸土石隄工宜修高郵城南石壩於秋盡水落照前河臣所估將五壩改爲四滾水壩辦料興修於壩下開引河使水有去路桃源縣黃河南岸隄工臣親看近長湖一帶土隄長四千二百餘丈應動帑加幫高厚以資捍禦歸仁隄臨河石工尙有罅隙椿朽之處飭其補砌古溝至六壩

俱係土隄每年歲修剗修糜費錢糧似宜修砌石隄以省歲修高家堰減水壩前河臣于成龍等將六壩改爲四滾水壩臣覆加相度地段相去不遠併爲三滾水壩於壩下就原有之草字河塘漕河開爲引河並築順水隄清河縣運口至高郵州界首一帶裏河宜加挑濬深通運口以至濱海一帶兩岸隄工伏汎居臨水勢恐甚於往年必須加幫高寬王家營減水大壩應酌開十餘丈兩頭下埽裏住洩黃漲漫溢之水由鹽河而出王家營引河飭革職河道馮佑作速挑挖深通准其贖罪如不成河不准贖罪駱馬湖口正對原築有竹絡壩一座節宣黃河大漲之水今黃河身高自去歲水漲漫缺二段黃河反流入駱馬湖口匯入中河亟宜堵築以禦黃水俟此口堵後然後將中河頭煞堵塞引駱馬湖水由舊中河進石閘入黃河助黃刷沙如遇黃水大漲恐其倒灌則閉閘以

禦之此閘近因金門下窄上寬不能下板到底應改修合式挑挖引河深通然後議堵中河引水入黃王家堂缺口已修月隄係浮沙單薄應培修高厚作爲正隄徐城對岸沙觜應挑挖引河資其衝刷河觜以殺大溜水勢郭家觜舊有石工至北門迤西而止臣率河官量度自北門石工頭起至段家莊止長六百五十餘丈加砌石工與舊石工一律平整不惟可保城池且可省歲修之費蘇家山石觜挑出河心以致韓家山一帶衝潰應自楊家樓起至段家莊月隄止築月隄長四百丈以爲重門之障黃運中三河隄岸見在勒限修築徐州邳州睢甯宿遷桃源清河山陽安東各州縣黃河險工臣逐一勘明應動支歲修錢糧進埽防護仍飭該管官當伏秋二汛晝夜防守務期保固均應如所請從之○丁亥諭大學士九卿等考取舉人進士特爲得人耳若或行賄夤緣而得之

則出身之本源不清而欲冀他日之爲忠臣良吏得乎今朕意欲凡係大臣子弟另編字號令其於此中較閱自必選擇其文之優劣大臣子弟既得選中又不至妨孤寒之路如此則於考試一事大有裨益爾等議奏又諭今科鄉場會令宗室考試宗室朕素加恩何患無官嗣後停其考試○庚寅以甘國樞爲左副都御史

天府府尹遷

○辛卯河道總督張鵬翮奏河工九款一隄工宜堅築加

幫之隄應將原隄重夯杵密打數徧俾極堅實而後於上再加新土勦築之隄先行平地夯深數寸而後於上加土建築層層如式夯杵行礮務期堅固不許近隄取土亦不許挖傷民閒墳墓該道廳不時往來巡查如有此等情弊即將修築官揭報以憑參究一椿工宜用整木籤釘入地極深授用整柴鑲壓極其堅固如仍前將木柴截用修築不堅旋築旋壞該道廳指名揭報以憑參拏追

究一平常工程概用龍尾埽稀釘排椿一遇風濤卽行塌卸虛糜帑金應行停止一修砌石工宜得法馬牙梅花等椿皆須用堅木密釘務極堅深面裏丁頭等石務極平整石灰須用重篩篩過多用米汁調和擣杵極其膠黏以之灌入令其無縫不到又用鐵錠鐵銅連絡上下合爲一片如或料物不堪短少灰米以及修砌草率立即指名揭報以憑據實參究一歲卹各工用埽最多而工程以平報險用料以少報多不無虛冒之弊本年修理次年估銷新陳相因易於牽混嗣後呈報險工一面估計數目申詳如係假捏卽以謊報奏參處分一挑河工程務將挑挖之土盡堆於原估隄上層夯礮成隄使之高寬以資捍禦挖河人員務須照估挑挖寬深不許將散土堆積儻仍蹈前轍以及引水淹漫虛報淤塞者除挑過土方用過錢糧一概不准銷算外仍以侵冒誤工嚴參拏問

一臣查閱河工見頂衝大溜之處對岸必有沙觜挺出此河曲之故也從此曲岸挑挖引河以殺水勢則對岸險工可平誠有如聖諭所示者因詢河官何以不卽遵行據稱挑挖引河須費錢糧甚多挖後引水大溜始能成河若逢緩水必致沙淤例應追賠是以人心懼縮臣思河工虛應故事挑挖不如式者理應賠修若實心任事挑挖之後偶致淤墊者應請聖恩免其賠修庶幾人無畏縮我皇上挑直之諭可以實見之奉行而河工有底績之期矣一河工官員有實心任事不避勞怨不侵帑金修防堅固者工成之日優敘卽用其怠玩推諉虛冒錢糧工程不堅固者宜卽糾參嚴加治罪一挑河築隄雇夫動至數千寒暑風雨極其勞苦工成之日應給印票該地方查驗免雜項差徭以酬其勞以上各條仰請天語申飭勒石河上永遠遵守得旨覽奏條陳河工弊端

詳悉切要極其周備著九卿詹事科道會同確議具奏○敕諭第
巴等曰邊境向有定處爾縱放營官喋吧昌側集烈將四川打箭
鑪內土司蛇蜡喳吧居住地方恃強盡行霸占漸次侵踞河東烏
泥若泥九州三處漸有窺伺嘉慶擦道之意又因內土司蛇蜡喳
吧漏言遂致於死種種妄悖實難寬假川陝總督席爾達已經具
奏據此豈非爾私示所屬人等侵犯邊境生事邊境地方豈可讓
與寸地此等事情爾俱違悖妄行敕旨一到將漸次侵占打箭鑪
及版圖內土司地方俱著退還打死內土司蛇蜡喳吧之營官卽
行解送不然生事之罪歸於爾身彼時悔之不及矣